

# JEDAN GRAD, JEDNA BORBA

Piše ko zna, smije i umije; izlazi kad treba i mora; štampa se u kućnoj radinosti.

## I POLICAJCI SU RADNICI... a neki su i - RADNICE.

### A i radnici i radnice su ljudi!

Policajci se razbole pa im treba zdravstveno.

Radnice Fortune se razbole ili ih udare policajci pa im treba zdravstveno.

Ali radnice Fortune ga nemaju – oteto im je.

**Kao što će novi Zakon o penzijama policajcima da otme zarađeno.**

Policajcima treba voda iz rijeke. Za kupanje, za piće, za pecanje, za gledat u ljepotu.

Ljudima iz Kruščice treba voda iz rijeke. Za kupanje, za piće, za pecanje, za gledat u ljepotu.

Ali ljudima iz Kruščice hoće da otmu rijeku.

**Oteće je i policajcima – presušice rijeka kao policijski penzioni fond.**

A policajci ostare pa im treba penzija.

Radnice Fortune ostare pa i njima treba penzija.

Ali radnicama Fortune su popljačkali i fabriku i penzije.

**Baš kao što će radnicima u policiji sad da opljačkaju penzije.**

Zašto onda radnici u policiji tuku

radnike i radnice u proizvodnji koji brane svoju muku?

Zašto tuku one koji brane rijeku za sve nas - pa i za policajce?

**ZAŠTO policajci  
tuku RADNIKE I RADNICE  
koji svojim radom pune i penzioni fond policije?**

**Znaju li policajci KOGA bi trebalo tući?**

SPECIJAL  
ZA POLICIJU

## **Iz pisma radnica gračaničke Fortune:**

### **NI PALICE NI ŠUTNJA NEĆE SLOMITI NAŠ OTPOR!**

Već ko zna koji put, samo u ovoj godini, gledamo kako sila u službi zakona tuče obespravljene ljude koji se drznu poremetiti račun pljačkaškoj eliti.

Sada su to radnice gračaničke Fortune – već danima, pod šatorima, pred tvornicom u kojoj su provele čitav radni vijek, a koja je privatizacijom uništena. Uprava se obogatila.

A radnici i radnice?

Oni su primali 250 maraka mjesečno za svoj rad: staž im nije uplaćen 19 godina. Sredstva za rad su im oduzeta, ne mogu ostvariti penziju, ne mogu se liječiti i ne mogu, nakon decenija teškog rada, živjeti bez poniženja.

Zato su radnice ove jeseni blokirale pogone i zahtijevaju da se hitno pokrene proizvodnja, ljudi vrate na posao u matičnoj fabrici, staž uveže a stečajni upravnik smijeni.

**Država je na njihove sasvim opravdane zahtjeve odgovorila po oprobanom receptu.**

Obračunava se sa njima kao što se obračunala sa radnicama tuzlanske Aide; kao što se obračunala sa radnicama Borca kojima je zabranjeno da podignu šatore pred zgradom vlade FBiH, pa su bile primorane stajati na snijegu i kiši za svoje penzije; kao što se obračunala sa hrabrim čuvaricama vode iz Kruščice.

**Sve njih država dočekuje silom i udarcima, kako bi odbranila isključivo privatni interes osiguran kriminalnim malverzacijama. To nam govori da nisu privatizirane samo naše tvornice, naše šume i rijeke, naše ulice i parkovi, već a je privatizirana i sama država.**

Policijsko nasrtanje na radnice Fortune jasno ukazuje na to da životi i rad običnih ljudi ne vrijede ništa u odnosu na privatnu, nezakonito stečenu svojinu parazitskih kapitalista.

### **Šta smo dakle od naše 'demokratizacije' dobili?**

Dobili smo pravo da nam privatizuju svu našu društvenu imovinu, a da pravo kapitaliste nad tom otetom imovinom postane svetinja pred kojom su sva naša prava – beznačajna.

Dobili smo i novu vrstu rodne ravnopravnosti pred policijom: kad tuku u odbranu interesa kapitaliste, policijske palice ne razlikuju radnicu od radnika.

**Zato tražimo da se hitno pokrene istraga svih slučajeva policijske brutalnosti nad golorukim ljudima koji brane opšte dobro ili svoja radna i druga prava. Sloboda okupljanja je jedno od naših temeljnih prava.**

**Zahtijevamo da se svima osigura uživanje tog prava bez nasilja i intervencije policije. Potrebno je momentalno, jasno i bezuvjetno stati na stranu svih onih koji hrabro pokazuju da naš rad, naše tvornice, naša dobra ne smiju i neće biti plijen mafijaške elite.**